

大般若波羅蜜多經卷第四百六十

唐三藏法師玄奘奉 詔譯

第二分巧便品第六十八之一

爾時具壽善現白佛言。世尊。若菩薩摩訶薩。成就如是巧便力者。發菩提心。已經幾時。佛告善現。是菩薩摩訶薩。發菩提心。已經無數百千俱胝那庾多劫。具壽善現。復白佛言。世尊。若菩薩摩訶薩。成就如是巧便力者。已曾親近供養幾佛。佛告善現。是菩薩摩訶薩。已曾親近供養。菟伽沙等諸佛。具壽善現。復白佛言。世尊。若菩薩摩訶薩。成就如是巧便力者。已植何

等殊勝善根。佛告善現。是菩薩摩訶薩。發心已來。無有布施淨戒安忍精進靜慮般若波羅蜜多所引善根。而不圓滿精勤修學。由此因緣。成就如是巧方便力。具壽善現。復白佛言。世尊。若菩薩摩訶薩。成就如是巧便力者。甚爲希有。佛告善現。如是如是。如汝所說。是菩薩摩訶薩。甚爲希有。善現。當知如日月輪。周行照觸四大洲界。作諸事業。其中所有若情非情。隨彼光明勢力而轉。各成己事。如是般若波羅蜜多。照觸餘五波羅蜜多。作諸事業。布施等五波羅蜜多。隨順般若波羅蜜多勢力而轉。各成己事。善現。當知如

轉輪王。若無七寶。不名輪王。要有七寶。乃名輪王。布施等五波羅蜜多。亦復如是。若離般若波羅蜜多。不得名爲波羅蜜多。不離般若波羅蜜多。乃得名爲波羅蜜多。善現。當知。如有女人。端嚴巨富。若無強夫所守護者。易爲惡人之所凌辱。若有強夫所守護者。不爲惡人之所凌辱。布施等五波羅蜜多。亦復如是。若無般若波羅蜜多。力所攝護。易爲天魔及彼眷屬之所沮壞。若有般若波羅蜜多。力所攝護。一切天魔及彼眷屬。不能沮壞。善現。當知。如勇軍將。妙閑兵法。善備種種堅固鎧仗。隣國怨敵。所不能害。布施等五波

羅蜜多。亦復如是。不離般若波羅蜜多。天魔眷屬增上慢人。乃至菩薩旃荼羅等。皆不能壞。善現。當知如瞻部洲諸小王等。隨時朝侍轉輪聖王。依彼輪王得至勝處。布施等五波羅蜜多。亦復如是。隨助般若波羅蜜多。由彼勢力所引導故。疾能證得一切智智。善現。當知如瞻部洲東方諸水。無不皆趣殑伽大河。隨殑伽河流入大海。布施等五波羅蜜多。亦復如是。無不皆爲甚深般若波羅蜜多之所攝引。乃能證得一切智智。善現。當知如人右手。能作衆事。如是般若波羅蜜多。能引一切殊勝善法。善現。當知如人左手。所

作不便。如是前五波羅蜜多。不能引生諸勝善法。善現。當知譬如眾流。隨其大小。若入大海。同得鹹名。如是前五波羅蜜多。要入般若波羅蜜多。乃得名爲能到彼岸。善現。當知如轉輪王。欲有所趣。四軍導從。輪寶居先。王及四軍。念欲飲食。輪卽爲住。旣飲食已。王念欲行。輪卽前去。其輪去住。隨王意欲。至所趣方。不復前去。如是前五波羅蜜多。與諸善法。欲趣無上正等菩提。要因般若波羅蜜多。以爲前導。進止俱隨。不相捨離。若至無上正等菩提。更不前進。善現。當知如轉輪王。欲有所至。四軍七寶。前後導從。爾時輪寶。雖

最居先而不分別前後之相。如是前五波羅蜜多與諸善法欲趣無上正等菩提。必以般若波羅蜜多爲其前導。然此般若波羅蜜多不作是念。我於前五波羅蜜多最爲前導。彼隨從我。布施等五波羅蜜多不作是念。甚深般若波羅蜜多居我等先。我隨彼故。所以者何。如是六種波羅蜜多及一切法。自性皆鈍。無所能爲。無有主宰。虛妄不實。空無所有。不自在相。譬如陽燄。光影水月。幻事夢等。其中都無分別作用。真實自體。爾時具壽善現復白佛言。世尊。若一切法自性皆空。無實相用。諸菩薩摩訶薩云何修行布施淨

戒安忍精進靜慮般若波羅蜜多。求證無上正等菩提。佛告善現。諸菩薩摩訶薩。於此六種波羅蜜多正修行時。常作是念。世閒有情。心恆顛倒。沈溺生死。不能自脫。我若不修巧便勝行。不能拔濟彼生死苦。我當爲彼諸有情類。勤修布施。乃至般若波羅蜜多。巧便勝行。趣證無上正等菩提。脫諸有情生死大苦。是菩薩摩訶薩。作此念已。爲諸有情。捨施內外一切所有。既捨施已。復作是念。我於內外都無所捨。所以者何。此內外物。空無自性。不可捨施。非唯屬我。是菩薩摩訶薩。由此觀察。修行布施波羅蜜多。疾得圓滿。速

證無上正等菩提。是菩薩摩訶薩。爲脫有情生死苦故。終不犯戒。所以者何。是菩薩摩訶薩。常作此念。我爲解脫一切有情生死苦故。求趣無上正等菩提。決定不應斷衆生命。乃至邪見。亦定不應求妙欲境。求天富樂。求作帝釋魔梵王等。亦定不應求聲聞地。或獨覺地。唯自解脫。是菩薩摩訶薩。由此觀察。修行淨戒。波羅蜜多。疾得圓滿。速證無上正等菩提。是菩薩摩訶薩。爲脫有情生死苦故。終不發起忿恚等心。假使恆遭毀謗凌辱辛楚呵嘖痛徹心髓。終不發起一念瞋恨。設復恆遭刀仗瓦石杖塊等物。捶打其身。割

截斫刺。分解肌節。亦不發起一念惡心。所以者何。是菩薩摩訶薩。觀察一切聲如谷響。色如聚沫。不應於中妄起瞋恨。壞諸善品。是菩薩摩訶薩。由此觀察。修行安忍。波羅蜜多。疾得圓滿。速證無上正等菩提。是菩薩摩訶薩。爲脫有情生死苦故。勤求一切殊勝善法。乃至無上正等菩提。於其中間。常無懈怠。所以者何。是菩薩摩訶薩。恆作是念。我若懈怠。不能濟拔一切有情。令其遠離生死大苦。亦不能得一切智智。是菩薩摩訶薩。由此觀察。修行精進。波羅蜜多。疾得圓滿。速證無上正等菩提。是菩薩摩訶薩。爲脫有情生

死苦故。修諸勝定。乃至無上正等菩提。終不發起貪
瞋癡等。俱行亂心。所以者何。是菩薩摩訶薩。常作此
念。我若發起貪瞋癡等。俱行亂心。則不能成利樂他
事。亦不能證所求佛果。是菩薩摩訶薩。由此觀察。修
行靜慮。波羅蜜多。疾得圓滿。速證無上正等菩提。是
菩薩摩訶薩。爲脫有情生死苦故。不離般若波羅蜜
多。乃至無上正等菩提。常勤修學。世出世間微妙勝
慧。所以者何。是菩薩摩訶薩。恆作是念。若離般若波
羅蜜多。於諸有情不能成熟。亦不能得一切智智。是
菩薩摩訶薩。由此觀察。修行般若波羅蜜多。疾得圓

滿。速證無上正等菩提。善現。由此因緣。雖一切法無
實相用。自性皆空。而諸菩薩摩訶薩眾。勤修六種波
羅蜜多。常無懈倦。求證無上正等菩提。爾時具壽善
現復白佛言。世尊。若一切種波羅蜜多。性無差別。皆
是般若波羅蜜多。所攝受故。皆由般若波羅蜜多。修
成滿故。應合爲一波羅蜜多。所謂般若波羅蜜多。云
何可說般若波羅蜜多。於五波羅蜜多。爲最爲勝。爲
尊爲高。爲妙爲微妙。爲上爲無上。無等無等等。佛告
善現。如是如是。如汝所說。如是六種波羅蜜多。性無
差別。皆是般若波羅蜜多。所攝持故。若無般若波羅

蜜多。布施等五。不得名爲波羅蜜多。要依般若波羅蜜多。布施等五。乃得名爲波羅蜜多。是故前五波羅蜜多。攝在般若波羅蜜多。由此唯一波羅蜜多。所謂般若波羅蜜多。是故一切波羅蜜多。性無差別。善現當知。如有情類。雖有種種色身差別。若有親近妙高山王。咸同一色。如是前五波羅蜜多。雖有種種品類差別。而爲般若波羅蜜多所攝受故。皆由般若波羅蜜多。修成滿故。皆入般若波羅蜜多。不可施設差別名姓。又布施等波羅蜜多。依止般若波羅蜜多。方得趣入一切智智。乃得名爲到彼岸者。是故六種波羅

蜜多。皆同一味。性無差別。不可施設。此是布施波羅蜜多。乃至般若波羅蜜多。所以者何。如是六種波羅蜜多。皆同趣入一切智智。能到彼岸。性無差別。由是因緣。布施等六。不可施設。名姓有異。具壽善現。復白佛言。波羅蜜多及一切法。若隨實義。皆無此彼勝劣差別。何緣故說般若波羅蜜多於五波羅蜜多爲最爲勝。爲尊爲高。爲妙爲微妙。爲上爲無上。無等無等等。佛告善現。如是如是。如汝所說。若隨實義。波羅蜜多及一切法。皆無此彼勝劣差別。但依世俗言說作用。說有此彼勝劣差別。施設布施波羅蜜多。乃至般

若波羅蜜多爲欲度脫諸有情類世俗作用生老病死。然諸有情生老病死皆非實有。但假施設。所以者何。有情無故。當知諸法亦無所有。甚深般若波羅蜜多。達一切法都無所有。能拔有情世俗作用生老病死。由斯故說般若波羅蜜多於五波羅蜜多爲最爲勝。爲尊爲高。爲妙爲微妙。爲上爲無上。無等無等等。善現當知。如轉輪王所有女寶。於人中女爲最爲勝。爲尊爲高。爲妙爲微妙。爲上爲無上。無等無等等。如是般若波羅蜜多於布施等波羅蜜多爲最爲勝。爲尊爲高。爲妙爲微妙。爲上爲無上。無等無等等。具壽

善現復白佛言。世尊。何緣數數讚說甚深般若波羅蜜多。於布施等波羅蜜多爲最爲勝。爲尊爲高。爲妙爲微妙。爲上爲無上。無等等。佛告善現。由此般若波羅蜜多以無所得而爲方便。普能攝取一切善法。和合趣入一切智智。安住不動。故我數數讚說般若波羅蜜多。具壽善現復白佛言。甚深般若波羅蜜多。於諸善法有取捨不。佛言不也。甚深般若波羅蜜多。於法都無若取若捨。何以故。以一切法皆不可取不可捨故。具壽善現復白佛言。甚深般若波羅蜜多。於何等法無取無捨。佛告善現。甚深般若波羅蜜多。

於色無取無捨。於受想行識無取無捨。於眼處乃至
意處無取無捨。於色處乃至法處無取無捨。於眼界
乃至意界無取無捨。於色界乃至法界無取無捨。於
眼識界乃至意識界無取無捨。於眼觸乃至意觸無
取無捨。於眼觸爲緣所生諸受乃至意觸爲緣所生
諸受無取無捨。於地界乃至識界無取無捨。於因緣
乃至增上緣無取無捨。於無明乃至老死無取無捨。
於布施波羅蜜多乃至般若波羅蜜多無取無捨。於
內空乃至無性自性空無取無捨。於眞如乃至不思
議界無取無捨。於苦集滅道聖諦無取無捨。於四念

住乃至八聖道支無取無捨。於四靜慮四無量四無色定無取無捨。於八解脫乃至十遍處無取無捨。於空無相無願解脫門無取無捨。於淨觀地乃至如來地無取無捨。於極喜地乃至法雲地無取無捨。於一切陀羅尼門三摩地門無取無捨。於五眼六神通無取無捨。於如來十力乃至十八不共法無取無捨。於三十二大士相八十隨好無取無捨。於無忘失法恆住捨性無取無捨。於一切智道相智一切相智無取無捨。於預流果乃至獨覺菩提無取無捨。於一切菩薩摩訶薩行無取無捨。於諸佛無上正等菩提無

取無捨。於一切智智無取無捨。具壽善現復白佛言。甚深般若波羅蜜多。云何於色無取無捨。乃至於一切智智無取無捨。佛告善現。甚深般若波羅蜜多。不思惟色。是故於色無取無捨。乃至不思惟一切智智。是故於一切智智無取無捨。具壽善現復白佛言。云何般若波羅蜜多。不思惟色。乃至不思惟一切智智。佛告善現。由此般若波羅蜜多。於色不思惟一切相。亦不思惟一切所緣。是故不思惟色。乃至於一切智智。不思惟一切相。亦不思惟一切所緣。是故不思惟一切智智。具壽善現復白佛言。若菩薩摩訶薩。不思

惟色乃至不思惟一切智智。云何增長所種善根。若不增長所種善根。云何圓滿波羅蜜多。若不圓滿波羅蜜多。云何證得所求無上正等菩提。佛告善現。若時菩薩摩訶薩。不思惟色乃至不思惟一切智智。是時菩薩摩訶薩。便能增長所種善根。所種善根得增長故。便能圓滿波羅蜜多。波羅蜜多得圓滿故。便能證得所求無上正等菩提。何以故。善現。諸菩薩摩訶薩。要是不思惟色乃至不思惟一切智智。乃能具足修諸菩薩摩訶薩行。證得無上正等菩提。具壽善現。復白佛言。何緣菩薩摩訶薩。要是不思惟色乃至不思惟

一切智智。方能具足。修諸菩薩摩訶薩行。證得無上正等菩提。佛告善現。諸菩薩摩訶薩。若思惟色。乃至思惟一切智智。則有所得。有所得故。便著欲界色無色界。若著欲界色無色界。不能具足。修諸菩薩摩訶薩行。證得無上正等菩提。若菩薩摩訶薩。不思惟色。乃至不思惟一切智智。便無所得。無所得故。則不著欲界色無色界。若不著欲界色無色界。乃至具足修諸菩薩摩訶薩行。證得無上正等菩提。是故善現。若菩薩摩訶薩。欲得具足。修諸菩薩摩訶薩行。欲疾證得所求無上正等菩提。當勤修學甚深般若波羅蜜。

多。不應思惟執著諸法。具壽善現復白佛言。若菩薩摩訶薩。精勤修學甚深般若波羅蜜多。當於何住。佛告善現。若菩薩摩訶薩。精勤修學甚深般若波羅蜜多。不應住色。乃至不應住一切智智。具壽善現復白佛言。何緣菩薩摩訶薩。精勤修學甚深般若波羅蜜多。不應住色。乃至不應住一切智智。佛告善現。若菩薩摩訶薩。精勤修學甚深般若波羅蜜多。於一切法無執著故。不應住色。乃至不應住一切智智。何以故。善現。是菩薩摩訶薩。不見有法。可於其中而起執著。及可安住。善現。如是菩薩摩訶薩。以無所著及無安

住而爲方便。精勤修學甚深般若波羅蜜多。復次善現。若菩薩摩訶薩。作如是念。若能如是無所執著。無所安住。精進修行甚深般若波羅蜜多。是修般若波羅蜜多。是行般若波羅蜜多。我能如是無所執著。修深般若波羅蜜多。我能如是無所執著。行深般若波羅蜜多。是行般若波羅蜜多。善現。是菩薩摩訶薩。由如是念。取相執著。遠離般若波羅蜜多。若遠離般若波羅蜜多。則遠離靜慮精進安忍淨戒布施波羅蜜多。亦遠離內空乃至無性自性空。亦遠離眞如乃至不思議界。亦遠離苦集滅道聖諦。亦遠離四念住。乃

至八聖道支。亦遠離四靜慮。四無量。四無色定。亦遠離八解脫。乃至十遍處。亦遠離空無相無願解脫門。亦遠離極喜地。乃至法雲地。亦遠離一切陀羅尼門。三摩地門。亦遠離五眼六神通。亦遠離如來十力。乃至十八佛不共法。亦遠離無忘失法。恆住捨性。亦遠離一切智道相智。一切相智。亦遠離一切菩薩摩訶薩行。亦遠離諸佛無上正等菩提。亦遠離一切智智。所以者何。甚深般若波羅蜜多。於一切法無所執著。非深般若波羅蜜多有執著者。及執著性。何以故。甚深般若波羅蜜多。都無自性。可於諸法有所執著。是

故善現。諸菩薩摩訶薩。修行般若波羅蜜多時。起如是想。此是般若波羅蜜多。我行般若波羅蜜多。則菩薩摩訶薩。修行般若波羅蜜多。於一切法。及深般若波羅蜜多。皆有執著。復次善現。若菩薩摩訶薩。修行般若波羅蜜多時。起如是想。此是般若波羅蜜多。我行般若波羅蜜多。則遍行諸法實相。是菩薩摩訶薩。由起此想。便退般若波羅蜜多。若退般若波羅蜜多。則退一切殊勝白法。何以故。甚深般若波羅蜜多。是一切種白法根本。若退般若波羅蜜多。則是退失一切白法。復次善現。若菩薩摩訶薩。作如是念。甚深

般若波羅蜜多。攝受布施淨戒安忍精進靜慮波羅蜜多。乃至攝受一切智智。是菩薩摩訶薩。退失般若波羅蜜多。若退失般若波羅蜜多。則不能攝受布施淨戒安忍精進靜慮波羅蜜多。乃至不能攝受一切智智。何以故。善現。非離般若波羅蜜多。能遍攝受菩提分法。及能證得一切智智。復次善現。若菩薩摩訶薩。作如是念。安住般若波羅蜜多。便於無上正等菩提。定得受記。是菩薩摩訶薩。則退失般若波羅蜜多。若退失般若波羅蜜多。則於無上正等菩提。不得受記。何以故。善現。非離般若波羅蜜多。可於無上正等

菩提得受記故。復次善現。若菩薩摩訶薩。作如是念。安住般若波羅蜜多。則能引發布施波羅蜜多。乃至靜慮波羅蜜多。如是乃至能引發大慈大悲大喜大捨。是菩薩摩訶薩。則退失般若波羅蜜多。若退失般若波羅蜜多。則不能引發布施波羅蜜多。乃至靜慮波羅蜜多。如是乃至不能引發大慈大悲大喜大捨。何以故。善現。非離般若波羅蜜多。而能引發安住勝法。復次善現。若菩薩摩訶薩。作如是念。佛知諸法無攝受相。自證無上正等菩提。得菩提已。爲諸有情宣說開示諸法實相。是菩薩摩訶薩。則爲退失甚深般

若波羅蜜多。何以故。善現。如來於法無知無覺。無說無示。所以者何。諸法實性不可知覺。不可施設。云何得有知覺說示一切法者。若言實有知覺說示一切法者。無有是處。爾時具壽善現白佛言。世尊。諸菩薩摩訶薩。修行般若波羅蜜多。云何當得遠離如是種種過失。佛告善現。若菩薩摩訶薩。修行般若波羅蜜多。作如是念。一切法無所有不可取。若法無所有不可取。則無有能現等覺者。亦無有能宣說開示。若如是行。是行般若波羅蜜多。離諸過失。若菩薩摩訶薩。著無所有不可取法。則離般若波羅蜜多。何以故。善

現甚深般若波羅蜜多。於一切法無所執著。無所攝受。若於諸法有所執著。有所攝受。則離般若波羅蜜多。具壽善現復白佛言。世尊。般若波羅蜜多。於般若波羅蜜多爲遠離。爲不遠離。乃至布施波羅蜜多。於布施波羅蜜多爲遠離。爲不遠離。如是乃至一切智智。於一切智智爲遠離。爲不遠離。世尊。若般若波羅蜜多。於般若波羅蜜多設遠離。設不遠離。云何菩薩摩訶薩能無執著。引發般若波羅蜜多。乃至若布施波羅蜜多。於布施波羅蜜多設遠離。設不遠離。云何菩薩摩訶薩能無執著。引發布施波羅蜜多。如是乃

至若一切智智。於一切智智。設遠離。設不遠離。云何菩薩摩訶薩。能無執著。引發一切智智。佛告善現。般若波羅蜜多。於般若波羅蜜多。非遠離。非不遠離。乃至一切智智。於一切智智。非遠離。非不遠離。是故菩薩摩訶薩。能無執著。引發般若波羅蜜多。乃至引發一切智智。何以故。善現。非即自性。非離自性。而能安住。引發自性。復次善現。諸菩薩摩訶薩。修行般若波羅蜜多。不執著色。謂此是色。此色屬彼。亦不執著受。想行識。謂此是受。想行識。此受想行識。屬彼。如是乃至不執著一切智智。謂此是一切智智。此一切智智。

屬彼善現。是菩薩摩訶薩。於如是一切法無執著故。便能引發般若波羅蜜多。乃至布施波羅蜜多。乃至能引發一切智智。何以故。善現。若菩薩摩訶薩修行般若波羅蜜多。於諸法中有所執著。謂此是法。此法屬彼。則不能隨意引發安住勝妙功德。復次善現。諸菩薩摩訶薩。修行般若波羅蜜多。不觀色。若常若無常。若樂若苦。若我若無我。若淨若不淨。若寂靜若不寂靜。若遠離若不遠離。亦不觀受想行識。若常若無常。若樂若苦。若我若無我。若淨若不淨。若寂靜若不寂靜。若遠離若不遠離。乃至不觀一切智智。若常若

無常。若樂若苦。若我若無我。若淨若不淨。若寂靜若不寂靜。若遠離若不遠離。是菩薩摩訶薩。於如是一切法。不觀察故。便能引發般若波羅蜜多。乃至布施波羅蜜多。如是乃至能引發一切智智。何以故。善現。若菩薩摩訶薩。修行般若波羅蜜多。於諸法中有所觀察。若常若無常。若樂若苦。若我若無我。若淨若不淨。若寂靜若不寂靜。若遠離若不遠離。則不能隨意引發。安住勝妙功德。復次善現。若菩薩摩訶薩。修行般若波羅蜜多。則爲修行靜慮精進安忍淨戒布施波羅蜜多。亦爲安住內空乃至無性自性空。亦爲安

住眞如乃至不思議界。亦爲安住苦集滅道聖諦。亦爲修行四念住。乃至八聖道支。亦爲修行四靜慮。四無量。四無色定。亦爲修行八解脫。乃至十遍處。亦爲修行空無相無願解脫門。亦爲修行菩薩十地。亦爲修行一切陀羅尼門。三摩地門。亦爲修行五眼六神通。亦爲修行如來十力。乃至十八不共法。亦爲修行無忘失法。恆住捨性。亦爲修行一切智道。相智一切相智。亦爲修行一切菩薩摩訶薩行。亦爲修行諸佛無上正等菩提。亦爲修行一切智智。復次善現。甚深般若波羅蜜多。隨所行處。所有一切波羅蜜多。及

餘一切菩提分法。皆悉隨行。甚深般若波羅蜜多。隨所至處。所有一切波羅蜜多。及餘一切菩提分法。皆悉隨至。善現。如轉輪王。隨所行處。四種勇軍。皆悉隨行。如轉輪王。隨所至處。四種勇軍。皆悉隨至。甚深般若波羅蜜多。亦復如是。隨有所行。及有所至。所有一切波羅蜜多。及餘一切菩提分法。皆悉隨行。究竟至於一切智智。善現。如善御者。駕四馬車。令避險路。行於正道。隨本意欲。能往所至。甚深般若波羅蜜多。亦復如是。善御一切波羅蜜多。及餘一切菩提分法。令避生死涅槃險路。行於自利利他正道。至本所求一

切智智。具壽善現白言。世尊。諸菩薩摩訶薩。云何爲道。云何非道。佛告善現。諸異生道。若聲聞道。若獨覺道。非諸菩薩摩訶薩道。依此不能往一切智智故。甚深般若波羅蜜多。所引六種波羅蜜多。是諸菩薩摩訶薩道。依此定能往一切智智故。具壽善現復白佛言。甚深般若波羅蜜多。出現世間。能辦大事。所謂示現諸菩薩摩訶薩道非道相。令諸菩薩摩訶薩眾。知是道是非道。疾能證得一切智智。佛告善現。如是如是。如汝所說。甚深般若波羅蜜多。出現世間。能辦大事。所謂示現諸菩薩摩訶薩道非道相。令諸菩薩摩

訶薩眾。知是道是非道。疾能證得一切智智。復次善現。甚深般若波羅蜜多。出現世間。能辦大事。所謂度脫無量無數無邊有情。令得殊勝利益安樂。善現。當知甚深般若波羅蜜多。雖作無邊利樂他事。而於此事無所取著。復次善現。甚深般若波羅蜜多。雖能示現色所作事。而於此事無所取著。雖能示現受想行識所作事。而於此事無所取著。如是乃至雖能示現一切智智所作事。而於此事無所取著。雖能示現聲聞獨覺所作事。而於此事無所取著。善現。甚深般若波羅蜜多。雖能引導一切菩薩摩訶薩眾。令趣無上

正等菩提。遠離聲聞獨覺等地。而於諸法無生無滅。以法住性爲定量故。具壽善現復白佛言。若甚深般若波羅蜜多。於一切法無生無滅。云何菩薩摩訶薩行深般若波羅蜜多時。爲諸有情應行布施。應持淨戒。應起安忍。應勤精進。應住靜慮。應修般若。佛告善現。諸菩薩摩訶薩。修行般若波羅蜜多時。緣一切智智。爲諸有情應行布施。應持淨戒。應起安忍。應勤精進。應住靜慮。應修般若。善現。是菩薩摩訶薩。持此善根。與諸有情同共迴向一切智智。如是迴向一切智智。則修六種波羅蜜多。速得圓滿。亦修菩薩慈悲喜

捨速得圓滿。乃至安坐妙菩提座。常不遠離。如是六種波羅蜜多。若不遠離。如是六種波羅蜜多。則不遠離。一切智智。是故善現。若菩薩摩訶薩。欲疾證得一切智智。當勤精進。修學六種波羅蜜多。當勤精進。修行六種波羅蜜多。若菩薩摩訶薩。常勤精進。修學修行。如是六種波羅蜜多。一切善根。速得圓滿。疾能證得一切智智。是故善現。諸菩薩摩訶薩。應與六種波羅蜜多常共相應。勿相捨離。具壽善現。白言。世尊。云何菩薩摩訶薩。能與六種波羅蜜多常共相應。不相捨離。佛告善現。若菩薩摩訶薩。如實觀色。非相應。非

不相應。如實觀受想行識非相應非不相應。乃至如實觀一切智智非相應非不相應。是菩薩摩訶薩。能與六種波羅蜜多常共相應。不相捨離。復次善現。若菩薩摩訶薩。恆作是念。我不應住色。亦不應住非色。我不應住受想行識。亦不應住非受想行識。乃至我不應住一切智智。亦不應住非一切智智。何以故。色非能住非所住。受想行識亦非能住非所住。如是乃至一切智智。非能住非所住。故善現。是菩薩摩訶薩。能與六種波羅蜜多常共相應。不相捨離。善現。若菩薩摩訶薩。能以如是無住方便。修行六種波羅蜜多。

是菩薩摩訶薩。疾能證得一切智智。善現。譬如有人。欲食菴沒羅果。或半娜娑果。先取其子。於良美田而種植之。隨時澆灌。守護營理。漸次生長。芽莖枝葉。時節和合。便有華果。果成熟已。取而食之。如是善現。若菩薩摩訶薩。欲得無上正等菩提。先學六種波羅蜜。多復於有情。或以布施。或以愛語。或以利行。或以同事。而攝受之。既攝受已。教令安住。布施淨戒安忍。精進靜慮般若波羅蜜多。既安住已。解脫一切生老病死。證得常住畢竟安樂。菩薩如是。當得無上正等菩提。轉妙法輪。度無量眾。是故善現。若菩薩摩訶薩。欲

於諸法不藉他緣而自悟解。欲能成熟一切有情。欲於佛土能善嚴淨。欲疾安坐妙菩提座。欲能降伏一切魔軍。欲疾證得一切智智。欲轉法輪。脫有情眾生老病死。證得常住畢竟安樂。應學六種波羅蜜多。以四攝事。方便攝受諸有情眾。既攝受已。應令安住布施淨戒安忍精進靜慮般若波羅蜜多。菩薩如是勤修學時。應於般若波羅蜜多常勤修學。

大般若波羅蜜多經卷第四百六十

音釋

俱胝

梵語也此云百億胝張尼切

那庾多

梵語也此云萬億庾弋渚切

怨敵

怨於袁切讐也敵亭也
阿噴阿虎何切大言而怒也
歷切仇也又拒抵也
噴側格切爭言貌又大
呼聲也
娜奴可
漑灌漑古愛切澆也
灌音貫澆也

大般若波羅蜜多經卷四百六十

四十二

出十

